

中吳紀聞

宋龔明之撰

下

進步書局校印

PDG

中吳紀聞卷第四

宋 崑山龔明之希仲紀

太公辟地處

常熟海隅山有石空十所昔太公辟紂居之孟子謂太公辟紂居東海之濱者此也常熟去東海正六十里故謂之海濱楊備郎中嘗作詩紀其事

范忠宣公

范純仁字堯夫為人寬厚長者文正嘗使至鄉還至京口見石曼卿數喪未舉盡以麥舟與之蘇黃門稱其為佛地位中人觀此亦可以見矣元祐中自慶帥召為給事中遂執政柄未幾拜右僕射凜然有父風烈為宰相一年出知潁昌府既而復入相坐元祐黨散官安置元符三年徽宗即位復召入為相尋即下世遺表有云蓋嘗先天下而憂期不負聖人之學此先臣所以教子而微臣所以事君後御題其墓碑云世濟忠直之碑子正平字子夷正思字子默學行亦為士林所稱

滕章敏公結客詩

滕章敏慷慨豪邁不拘小節少嗜酒浮湛里市與鄭獬毅夫為忘形友議論風采照

映一世書與毅夫及楊繪元素同試京師自謂必魁天下與二公約若其言不驗當厚致其罰已而鄭居榜首楊次之公在第三二公責所約之金答曰一人解一人會吾安得不居第三俱一笑而散公平生不妄交遊嘗作結客詩云結客結英豪休同兒女曹黃金裝背鐵猛獸畫旂旋北闕芒星落中原王氣高終令賀蘭賊不著精黃袍其立志可見矣

思賢堂

郡齋後有思賢堂以祠韋白劉三太守後更名三賢紹興末洪內相景嚴為郡益以唐王常侍仲舒本朝范文正之像復號為思賢堂今參政范公作記

郡庫亦有三賢堂贈文正

范公并安定胡先生及光祿朱公像於其中

顧學正

顧襄字公甫為太學上舍生名聲藉甚士流皆推之登熙寧九年第調潤州丹徒尉召還為太學正元豐五年卒於京師時二親猶在鄭達夫太宰與公甫為同舍生以詩挽之云可惜病相如誰尋封禪書

公病瘍而卒

雙親千里外一葉九秋餘風露翻歸旆塵埃鎖故廬虎丘山下路會葬有鄉車廣文官舍冷如水幾數朝衫脫未能忽買春

田埋玉地猶懸絳帳讀書燈佳名空綴仙都石妙偈爭傳海寺僧一幅粉旌春水漫
惜君誰不涕奔騰

鄭希尹

鄭景平字希尹居帶城橋為人剛正不詭隨蒞官有廉聲嘗為大理每有疑獄中夜
焚香露拜斷得其情以故人無寃死者既而請老家居朝廷以其精力有餘落職致
仕守鄱陽到官未半歲拂袖而歸先君與公厚善因問其故答曰天子命景平為郡
守當以撫字為職乃不得行其志今日須金幾百兩明日須金幾千兩枯骨頭上打
不出也景平後世要人身在其志竟不可奪也時朱勔用事勢可炙手士大夫俛節
從之者甚多惟公始終無附意子綢字天和

執爨詩

程光祿自幼穎悟年五六歲時戲劇竈下家奴嫗之曰汝能狹劣爾豈解為文章邪
公怒曰吾豈不能家奴曰試為我吟一燒火詩即應聲曰吹火鶯脰斂投柴玉腕斜
回看烟裏面恰似霧中花甫冠登第

王元之画像

虎丘御書閣下有王黃州畫像東坡過蘇日見之自謂想其遺風餘烈願為執鞭而不可得因為之作贊今猶書其上

雙蓮堂

雙蓮堂在木蘭堂東舊芙蓉堂是也至和初光祿呂大卿濟叔以雙蓮花開故易此名楊備郎中有詩云雙蓮倒影面波光翠蓋風搖紅粉香中有畫船鳴鼓吹簫然驚起兩鴛鴦政和中盛密學季文作守亦產雙蓮范無外賦木蘭花詞云美蘭堂畫永晏清暑晚迎涼控水檻風簾千花競擁一朵偏雙銀塘盡傾醉眼訝湘娥倦倚兩霓裳依約凝情鑑裏竝頭宮面高粧蓮房露臉盈盈無語處恨何長甫翡翠憐紅鴛鴦妬影俱斷柔腸淒涼菱荷暮雨褪嬌紅換紫結秋房堪把丹青對寫鳳池歸去攜將

孫若虛滑稽

孫實字若虛早年英聲藉甚性好滑稽郡庠有同舍生牛其姓者因作牛秀才賦嘲之云腰帶頭垂尚有田單之火幘頭脚上猶聞甯戚之歌又作書語集句譏一老生云孜孜為善雞鳴起先王之道斯為美四十五十無聞焉斯亦不足畏也已樂圖先生為教授知之命其父訓敎孫由此發憤游太學不數歲登第而歸嘗入朝為寺丞

後守台州卒

慧感夫人

慧感夫人舊謂之聖姑或以為大士化身靈異甚著祝安上通守是邦事之尤謹每有水旱惟安上禱祈立驗後以剡薦就除台守既至錢塘詰旦欲渡江夢一白衣婦人告之曰來日有風濤之險既覺頗異之卒不渡至午颶風倏起果覆舟數十獨安上得免一夕盜之祠中竊取禧平旦廟史入視之見一人以幡纏其身環走殿中因執以問答曰某實盜也夜半幸脫已踰城至家矣今不知潛制於此神之威靈使然敢不伏辜逮炎聞賊虜將至城下有一居民平昔謹於奉事夢中告之曰城將陷矣速為之避謹勿以此告人佛氏所謂劫數之說不可逃也不數日兵果至其它神驗不一後加封慧感顯祐善利夫人今叅政范公作記

元少保

元絳字厚之居第在帶城橋登天聖五年進士甲科初任金陵幕官尋即進用屢為藩郡帥時有傳懷智高餘黨寇二廣者遂以公知廣州而所傳乃妄因改之越州公謝上表云忽聞羽檄之音謂有龍編之警橫水光明之甲得自虛聲雲中赤白之囊

偶為危事。橫水光明之甲。乃唐時誤傳寇至。事見李德裕獻替記。人服其工。公在金陵時。王荊公之父益為通守。與公厚甚。荊公既相。神宗一日欲謹選翰林學士。公久在外。老於從官。荊公對曰。有真翰林學士。但恐陛下不能用爾。況已作龍圖閣學士。難下遷知制誥。遂自外遷翰林學士。中外大驚。既就列。有稱職之譽。公最長於四六。多取古今傳記佳語為之。神宗友愛嘉岐二王。不許出閣。二王固辭。後因改封。先召公謂之曰。可於麻詞中勿令更辭。公遂草制。其略云。列第環宮。彌聲開元之盛。側門通禁。共承長樂之顏。神宗甚愛之。自是二王不復辭。未幾。叅大政。元豐中罷政。知潁州時。以藩邸升為順昌軍節度。公作謝表云。燾土立社。是開王者之風。乘龍御天。厥應聖人之作。按圖雖舊。其命維新。又曰。興言峻命之慶。基宜申中軍之望。府謂文武之德。順而盛。唐虞之道。明而昌。合為嘉名。以侈舊服。士大夫皆傳誦之後。以太子少保致仕歸吳中。公既還鄉。與程光祿諸公為九老會。日以詩酒自娛。年七十餘卒。有玉堂集三十卷。初公知荆南。嘗夢至仙府。與三人連書名。旁有告之曰。君三人蓋兄弟也。覺而思之。不知所謂。既入翰林為學士。韓持國維楊元素繪在院。一日因書奏列名三人。偏旁皆從系。始悟夢中兄弟之意。既而持國元素皆補外公。亦尹京兆。後

三年復與元素還職而鄧文約相繼為直院則三人名又皆從系蓋始終皆同以此知升沈進退決非偶然者許大夫選嘗作四翰林詩記其事公和云連名適似三株樹傳玩驚看五朵雲此亦一時之異也

仲殊

仲殊字師利承天寺僧也初為士人嘗與鄉薦其妻以藥毒之遂棄家為僧工於長短句東坡先生與之往來甚厚時時食蜜解其藥人號曰蜜殊有寶月集行於世慧聚寺詩僧學草堂以其喜作艷詞嘗以詩箴之云大道久凌遲正風還彫靡無人整頽綱目亂空傷悲卓有出世士蔚為人天師文章通造化動與王公知囊括十洲香名翼四海馳肆意放山水灑脫無羈縻縻雲輕三事袖珩錫天下之詩曲相間作百紙頃刻為藻思洪泉瀉翰墨清且奇惜哉大手筆胡為溫柔詞願師持此才奮起筆澆漓驚彼東山蒿圖祖進豐碑再續輔教編高步凌丹墀乞日僧史上萬世為蒼龜迦葉聞琴舞終被習氣隨伊子浮薄人贈言增忤怍倘能循我言拂日重光離老乎之言雖苦口殊竟莫之改一日造郡中接坐之間見庭下一婦人投牒立於雨中守命殊詠之口就一詞云濃潤侵衣暗香飄砌雨中花色添憔悴鳳鞋溼透立多時不言

不語厭厭地。眉上新愁。手中文字。因何不倩鱗鴻寄。想伊只訴薄情人。官中誰管閑公事。後殊自經於枇杷下。輕薄子更之曰。枇杷樹下立多時。不言不語厭厭地。

如村

胡嶧字仲達。五柳之子。文與行皆能繼其父。與方子通為忘年交。後以年格推調安遠尉。非其志也。乃取老杜諸孫貧無事。宅舍如荒村之句。自號如村老人。治園築室。遺外聲利。自放於閑適。而終不出仕。有文集二十卷。號如村冗藁。唯室先生及參政周公葵皆為作序。子伯能登進士第。

鄭穀夫吳江橋詩

鄭獬字穀夫。嘗作吳江橋詩。寄劉孜叔楸云。三百闌干鎖画橋。行人波上踏靈鼈。插天蟬竦玉腰闊。跨海鯨鯢金背高。路直鑿開元氣白。影寒壓破大江豪。此中自與銀河接。不必仙槎八月濤。劉時為吳江尉。亦有和篇。皆刻之石。鄭詩題云。寄同年叔楸。秘校刻於詩前。具位加榜下二字於其上。乃原父之弟也。

張幾道挽詩

張僅字幾道。居萬壽寺橋。與顧崇叔恩皆為王荊公門下士。荊公修三經義。二公與

焉。幾道登第，未幾捐館。方子通作挽詩云：吳郡聲名，顧與張龍門當日共；升堂青衫始見，登華省丹旄俄聞入故鄉。含淚孤兒生面垢，斷腸慈母滿頭霜。嗟君十載人間事，不及南柯一夢長。至今誦其詩者，為之出涕。吳人目子通為方挽詞幾道官至著作郎。

范文正不取燒煉方

范文正少養於朱氏，朱南京人。文正幼年肄業京學，同舍有病者，親為調藥以療病。亟屬文正曰：吾無以報子。平生有一術，遊遠方未嘗窮乏者，用此術也。今以遺子，因授藥一囊，方書一小冊。文正不得已留之，未嘗取視。後二十餘年，得其子還之，封記如故。

夜航船

夜航船，唯浙西有之。然其名舊矣。古樂府有夜航船之曲，皮日休答陸龜蒙詩云：明朝有物充君信，檣酒三瓶寄夜航。

俗語

吳人呼來為釐。始於陸德明，詒我來牟。蓋德明吳人也。又吳人言罷則以休鹽之始。

於吳王。一日吳王語孫武子曰將軍罷休亦吳語也。

方子通詩誤入荆公集

方子通一日謁荆公未見有詩云春江渺渺抱牆流烟草茸茸一片愁吹盡柳花人不見春旗催日下城頭荆公親書方冊間因誤載臨川集後人不知此詩乃子通作也。

盧發運

公諱東擢皇祐元年進士第元豐中為發運使其父太忠公退老公每歲上計得請歸鄉後帥涇原懇辭歸養屢賜手詔慰勉時以為榮。

大雲翁

林宥字德祖旦之子擢進士第為常州教授在職六年學者信服大觀二年大比試決科者四十餘人於是賜詔曰閱前日賓興之數較其試中多寡以常州為最苟依常格推恩非古人進賢受上賞之意特改宣德郎郡守因以進賢揭坊名於學之南郡人崇之後除河北路提舉學士任滿除開封府左司錄居數月浩然有歸志優詔如所請公既勇退屏置朝服足不踐州縣舊隱在大雲坊因自號大雲翁卒年六十六葬博士塢平生好古嗜學有大雲集一百卷神宗皇帝聖訓錄一十卷。

花客詩

張敏叔嘗以牡丹為貴客梅為清客菊為壽客瑞香為佳客丁香為素客蘭為幽客蓮為淨客酴醾為雅客桂為仙客薔薇為野客茉莉為遠客芍藥為近客各賦一詩吳中至今傳播。

中吳

平江本吳國在秦屬會稽郡東漢分會稽置吳郡陳為吳州隋為蘇州大業末復為吳郡唐武德中復為蘇州乾寧中錢氏據錢塘蘇湖之南悉其奄有後唐為中吳軍節度皇朝興國中置平江軍節度又復為之蘇州嘗為徽宗潛藩遂陞為府。

祖姑教子登科

予之祖姑適知泉州德化縣李處道祖姑甚有文讀書通大義賦詩書字皆過人其子援登進士第乃祖姑所親教也晚而事佛誦蓮經皆千過嘗問法於圓照禪師師名之曰守安年幾七十而卒既得疾即屏藥餌書佛頂呪焚之灰為丸并以燃燈法授援曰我死置灰丸懷中燃燈如法也因起坐誦大士名號久之而化既小殮視其手指屈結皆成印相佛徒歎服沙門為不可及張文潛學士為墓志首記其事。

范秘丞

范世京字延祖龍圖公之子登皇祐五年進士第調應天府柘城簿和州歷縣令時龍圖公出守四明公亟走膝下曰人子者事親之日少而事君之日多豈忍曠年失定省耶既而龍圖公捐館扶喪歸鄉垢面跣足晝夜哀號不絕行道之人莫不嗟惻服除知秀州海鹽縣勸民孝友睦姻及耕桑之事治聲動浙右熙寧初朝廷銳意改作召公管勾湖北廣惠倉至京師論不合乃辭歸舊治海旁之民間公復來驩呼鼓拊已而有疾乞以本官歸田里乃卒詔授秘書丞致仕享年四十一公居鄉與樂圃先生甚厚有文集若干卷藏于家

徐朝議

徐師閔字聖徒仕至朝議大夫退老于家日治園亭以文酒自娛樂時太子少保元公絳正議大夫程公師孟朝議大夫閻丘公孝終亦以安車歸老因相與繼會昌洛中故事作九老會章岵為郡守大置酒合樂會諸老於廣化寺又有朝請大夫王琬承議郎通判蘇湜口口公賦詩為倡諸公皆屬而和之以為吳門盛事元公少保和篇云五日佳辰郡政閑延賓談笑豁幽關閨門歌舞尊臺上林屋烟霞指顧間德應

華星臨頽尾。年拘皓髮下霜顏。名花美酒疎鐘永。坐見斜暉隱半山。方子通亦有和篇云。使君瀟灑上賓間。金地無人晝閉關。風靜簫聲來世外。日長仙境在人間。詩成郢客爭揮翰。曲罷吳姬一破顏。此節東南無此會。高名千古映湖山。章牧以五日開宴。故二詩皆及之。

顏夫子

顏長民登元豐二年進士第三。子采為孚。亦相繼擢高科。采字君用。終提舉常平。為字仲謙。終嚴陵守。孚字瑞中。崇觀間有聲於太學士行。甚美。每試必居前。列皆目之。為顏夫子。人欲識其面而不可得。既登第。膝樞密康許嫁以女。尋即下世。

信義縣

崑山在蕭梁時分婁置縣。號信義。屬信義郡。大同初分信義置崑山。馬華亭舊亦為蘇之屬邑。或云嘗割崑山之境以縣華亭。今華亭亦有崑山。時人嘗以片玉比機雲兄弟。而以此為北崑山。縣舊有城。古圖經云在縣東三百步。今謂之東城者是也。近歲耕者於薦嚴寺田中得城磚甚多。及箭鏃以銅為之。識者疑其為春秋時物。今縣之西二十里許有村曰信義。如婁縣之存舊名也。俗遂訛為鎮義。汴人龔穉仕至殿

中侍御史居於是村之南因插銀杏枝活時人異之目為遇仙云

李無悔

李無悔名行中本雲川人徙居淞江高尚不仕獨以詩酒自娛晚治園亭號醉眠東坡先生與之游每以詩贈之無悔有讀顏魯公碑詩云平生肝膽衛長城至死圖回色不驚世俗不知忠義大百年空有好詩名又賦佳人嗅梅圖云顰眉顰髻金衣折得梅花第幾枝嗅盡餘香不回面思量何事立多時其詩意尚深遠大率類此

蟹

吳之出蟹舊矣吳越春秋云蟹稻無遺種又陸魯望集有蟹志云漁者緯蕭承其流而障之曰蟹斷又曰稻之登也率執一穗以朝其魁然後縱其所之今吳人謂之輸芒

大本錢王後身

圓照在靈巖時有一藍縷道人自號同水客往造其室中守門者莫能過既而圓照屏侍者與語竊聽之者聞圓照末後一語云汝今幾甲子矣答云八萬四千恒河沙數甲子圓照云八萬四千恒河沙數甲子以前又作麼生道拂袖而出云錢大錢大

又待瞞人也。當時疑圓照為吳越後身。道人為洞賓。

郊正夫失鶴詩

正夫童時作失鶴詩云。久鎖冲天鶴。金籠忽自開。無心戀池沼。有意出塵埃。鼓翼離幽砌。凌雲上紫臺。應陪鸞鳳侶。仙島任徘徊。其志已不凡矣。

黃姑織女

崑山縣東三十六里。地名黃姑。古老相傳云。嘗有織女。牽牛星降于此。地織女以金筯劃河。水湧溢。牽牛因不得渡。今廟之西有水名百沸河。鄉人異之。為之立祠。按荆楚歲時記。黃姑者河鼓也。牽牛謂之河鼓。後人說其聲為黃姑。潘子直云。亦猶牽落之語。轉呼為牽郎耳。鄉人因以名其地。見於題咏甚眾。古樂府云。東飛百勞西飛燕。黃姑織女時相見。李太白詩云。黃姑織女相去不盈尺。李後主詩云。迢迢牽牛星。杳在河之陽。粲粲黃姑女。耿耿相望。劉筠內翰詩云。百勞東翫燕。西飛又報黃姑織女期。其它不能盡載。雖非指此黃姑。然得名之由。亦可類推。祠中列二像。建炎兵火時。士大夫多避地東岡。有范姓者。經從祠下。題於壁間云。商飈初至。月埋輪。烏鵲橋邊。綽約身聞。道佳期唯一夕。因何朝。莫對斯人。鄉人遂去。牽牛像今獨存。織女存焉。禱

祈之間。靈跡甚著。每至七夕。人皆合錢為青苗會。所收之多寡。持盃投問之。無毫釐不驗。一方甚敬之。上有廟記。今不復存矣。

孫積中

孫載。字積中。其曾祖漢英。仕錢氏。嘗為蘇州崑山鎮防邊使。故為崑山人。公初岐嶷如成人。既學。為師友所推譽。治平二年。進士及第。為河中府戶曹。更三守。皆立威嚴。者。公獨與之。舉曲直。矯矯不少下。終以此見知。或稱薦之中書。檢正官。察訪關中。辟公為官。屬公務攸助之。亦不苟與之合。乾祐縣去永豐最遠。青苗法行。乾祐不以予民察訪。怒移其令。檄公往案之。公還言。邑小民貧。其徒以秦麥博易為生。且法之初。民未知稱貸於公家為利。令無罪。且還其任。用薦者。還官知湖州德清縣。公聽斷精明。不專任刑罰。開說其是非。出於至誠。訟有累年不決者。聞公一言。感悟相捨去。熙寧八年。吳越飢。獨縣中熟。公勸大家乘時倍糴得米一十餘萬斛。明年春。米價騰踊。公平其直。使糶賴以全活者。至不可數計。其他便民者。別有十數事。德清人至今德公。又用薦者。遷官知考城縣。官制行。換奉議郎。其治考城。與德清如一日也。以最聞。縣四鄰皆重法。地素饒盜。公明常格嚴保伍。奸無所囊橐。一日。都監與尉來告盜集。